

Šnórowanje džěćo njeznaje. Wosebite wjeselo pak je za džěći, hdyž smědža při wšelakich składnosćach hić jako „małe družki“ a kóždy z nas, kiž je raz widzał „mału družku“, je hakle tak prawje začul rjanosć a něžnosć džěsća.

V. Serbska narodna drasta w naložku a wobrjadze.

Kóždy narodna drasta ma wěsty naložk a wobrjad, kotryž jenož zrozumimy z tradicije cyleho ludoweho žiwjenja a druha, kiž je hluboko zakótwjena w primitivnej zhromadnosći. Samo to powšitkowne čłowjeske so tu předobywa, njech je často podušene přez někajku zwjeršnosć abo zwonkownosć, kaž smy to we wšelakich wotřezkach pytnyli. Naložk a wobrjad je džěl cyleje ludnosće, tež naložk a wobrjad drasty. Wobsteji we wašnju, k a k ludowe kubło je žiwe w ludze, k a k swoje formy wuwija abo hewak so jewi. Tež drasta katolskich Serbow znaje naložk a wobrjad, kiž nimo přiwzateho a přinučeného hišće jasnje pokazuje zjewy powšitkowneho spočatneho zmyslenja.

Mužojo su tež w katolskich kónčinach, kaž to wšudže nazhonimy, swoju narodnu drastu wotpožili. Žona wostanje zwjetša doma, nima wulkeho zwiska ze swětom a tak krućišo zakhowa stare wašnja. Z tym pak njeje hišće rozsudžene, zo tohodla w mužskej drasće nimamy wjačy žadyn naložk drasty. Tamna stara duchowna zmyslenosć so nihdy njeje zhubila, je jenož někak podušena abo je na někajkežkuli wašnje wutworila nowe formy! Tomu jenož mały přikad! Serbja stajnje rady rejwachu. Naš mištr Bj. Krawc je džěn nam někotre serbske ludowe reje zakhował. Tež džensa Serb na rejach jenož njepřihladuje, rady sej do rejki zawjertnje a to wosebje rad na serbskim kwasu! Kóždy swój kabat wotpožiji a hordže w swojej bělej košli so wupjera, rejuje „wuslěkany“. Młodzi a stari so po tutym wašnju maja a je cyle njemóžno mjez nimi přebywać bjez toho, zo so njeby tež po samsnym wašnju měl. Su će „do rejow wołali“, a chceš-li w towaršnosći być, potom so samo rozumi, zo to tež wobkedžbuješ a so sam tež po tym maš. Hewak bórzy na tebje řeča: „Čehodla so njewuslečeš, čehodla w rukawach njerejwaš?“ So wě, zo praktiske winy tu soburěča, tola mam za to, zo je praktiski zaměr jenož jena strona tamneho kuliskeho wobrjada.

Narodna drasta katolskich Serbowkow ma wosebity